

Armonizazio fiskalari ekiteko Bruselak Daewoo erabili izana salatu du Imazek

Estatuek defentsarako duten aukera ez duelako aukeratu dute EAE, sailburuaren ustez

Asier Pz. de Karkamo / Gasteiz

Eusko Jaurlaritzak Daewoo enpresa korearrari emandako diru laguntzak gehiegizkoak zirelako Europako Batzordeak legez kanpokotzat jotze-

ko argudio ekonomiko eta legalik ez dagoela esan zuen atzo Josu Jon Imaz Industria sailburuak. Europako Batasunaren armonizazio fiskalari ekiteko erabili du Bruselak epaia, sailburuaren iritziz. Estatuek defen-

tsarako duten aukera ez du EAEk eta hori izan da Europako Batzordearen erabakiaren arrazoia, Industria sailburuak atzo Legebiltzarrean oposizio alderdiek eskatuta egin zuen agerraldian esan zuenez.

ITXAROPENTSU baina kezkatu zegoen atzo Josu Jon Imaz Industria sailburua Legebiltzarrean Daewoo auziaz mintzatzeko eginiko agerraldian. Itxaropentsu, Jaurlaritzak «arrazoia eta argudioak alde» dituelako. Kezkati, baina, Europako Batzordeak «armonizazio fiskalerantz jotzeko jazoera eredu garrantzatu» jo nahi izan duelako Koreako enpresa Gasteizen eraikitako lantegiari emandako diru laguntzen ingurukoa. EAEk Europako estatuek «babesteko duten ahalmena ez duenez» ekin diote euskal fiskalitatearen aurka, Imazen ustez.

Bai Jaurlaritzak bai Arabako Foru Aldundiak errekurritu egingo dute Daewoori emandako subentzioak gehiegizkoak direlakoan legez kanpokoak direla adierazten duen epaia. Errekurtsoen azterketak arrazoia emango diela agertu zuen atzo sailburuak Legebiltzarreko Industria Batzordean, Talde Mistoko Pablo Mosqueraren (UA) eta Koldo Usinen (IU) galderei erantzutenez.

Europako Batzordean diru-laguntzen aurka Elektrotresnen Sortzaileen Elkarre Nazionalak jarritako salaketak elektrotresnen merkaturak gainezka zegoela argudiatzen zuen eta Daewoo Gasteizen ezartzea arloko gainontzeko enpresen kalte-



MIREN SAEZ

Daewoo multinazionalak Gasteizen duen hozkailu plantako langile bat.

rako izango zela. Duela aste gutxi Fagor enpresaren emandako datu ekonomikoen arabera «salaketa fundamentorik gabea» zela erakutsi zutela esan zuen Imazek. Izan ere, Fagorrek iaz 167 lanpostu berri sortu zituela eta, 97arekin alderatuz, salmentak %18,7an hazi zirela agerian martxoaren 18ko komunikabideetan. «Datuok», esan zuen Imazek, «99ko aurrei-

kuspenak oso aldekoak ziren, gainera».

Astlehenean bilera

Hozkailu enpresaren proiektuak aurrera segituko duela ziurtatzen eman du Imazek. Nolanahi ere, datorren astlehenean Jaurlaritzako eta enpresa korearreko arduradunek hitzordua dute la jakinarazi zuen, Europako

erabakia eta Jundizko lantegian eduki ditzazkeen ondorioak aztertzeko. Daewooko langileen lan baldintzetaz ere mintzatuko dira. Legebiltzarreko talde guztiek kezka agetu zioten atzo Imazi, Daewooko langileekin daraman politika zela-eta. Besteak beste, hiru langile ordezkarikaleratu zituen enpresak, beren aldi baterako kontratuak amaitu ostean.

Erakundeetako ordezkariek Daewookoekin elkartuko dira

■ EUSKO JAURLARITZAKO, Arabako Aldundiko eta Daewooko ordezkariek datoren maiatzaren elkartuko dira egoera aztertzeko, Europako Batzordeak enpresarentzako diru laguntzak legez kanpokotzat jo eta Jaurlaritzak nahiz Aldundiak erabaki horren aurka helegitea aurkeztea erabaki eta gero.

Bruselak «lehia librearen aurkakotzat» jo zituen Koreako taldeak Gasteizen hozkailu fabrika zabaltze-

ko Jaurlaritzatik eta Aldunditik jasotako diru laguntzak, eta dirua itzultzera behartu zuen enpresa.

Erabaki horren ostean, erakundeetako ordezkariek eta enpresakoak martxoan elkartu ziren. Ordukoan, Daewoo Gasteizko plantari eusteko prest azaldu da, eta erakundeek Bruselaren erabakiari aurre egiteko asmoa agertu zuten. Bilera hartan bi hilabete iraganda berriz elkartzekotan geratu ziren.

Bruselak ontzat jo ditu Nafarroan 2.500 milioiren diru laguntzak

■ EUROPAKO BATZORDE- AK ontzat jo zuen atzo Iruñeko Gobernuak Rockwool Peninsular enpresari Kaparroson (Nafarroa) inbertsio bat egiteko onartutako 2.544 milioi pezetaren diru laguntza. Nafarroako Gobernuak, herriko Udalak eta enpresak hilabete luze eman dituzte inbertsioa eta laguntzak negoziatzen. Enpresak guztira 12.000 milioi pezeta inbertituko ditu lantegi horretan.

Enpresa honek, Dani-

markako izen bereko multinazional baten filialak, harkaitz artile deritzon materiala ekoiztuko du Kaparroson. Materiale hori eraikuntzan erabiltzen da etxebizitzaren isolatzaile gisa, eta Rockwool-ek guztira 800.000 metro kubiko produzituko ditu. Multinazionalak 107 lanpostu zuzen sorraraziko ditu Nafarroako fabrika horretan, gehi zeharkako beste 76 enplegu, Nafarroako Gobernutik azpimarratu du-

laburrean

■ MCCko Industri Taldeak 1.679 lanpostu sortu ditu 1996-1998 bitartean

MCC Korporazioaren Industri Taldeak 1.679 lanpostu sorrarazi eta 55.000 milioi pezetaren inbertsioak egin zituen 1996-1998 hirurtekoan. Horrela, Arrasateko kooperatiba taldeak bete egin ditu 1996an Eusko Jaurlaritzarekin sinatutako hitzarmenaren helburuak, Josu Jon Imaz Industri sailburuak esan duenez. Hitzarmen horren helburuak 1999rako 1.600 lanpostu sortu eta 83.000 milioiren inbertsioak egitea dira.

■ Dema programako dozena bat proiektu enpresa bilakatuko dira

DEMA izeneko Bizkaiko Aldundiaren sozietateak eta Euskadiko Kutzak bultzatutako enpresak sustatzeko programaren lehenengo fasea gainditu duten 17 proiektuetatik dozena bat enpresa bilakatuko dira. Bi erakundek 48 milioi pezeta jarriko dituzte, proiektu bakoitzari lau milioi pezetaz lagundu ahal izateko. Enpresa hauek, gainera, Aldundiaren eragingarri fiskalak eta Euskadiko Kutzaren mailegu erreztasunak izango dituzte.

■ UGTren eta CCOOren mobilizazioak 35 lanorduen alde

UGT eta CCOO sindikatuek mobilizazioak burutu zituzten atzo EAEn, 35 lanorduen alde nork bere aldetik aurrera daramatzaten kanpainen testuinguruan. UGTk ordezkariek biltzarra egin zuen Gasteizen, eta CCOOk Derioko egoitza inauguratu eta kanpaina egin zuen eskualdeko industrialdeetan. Carlos Trevilla eta Santiago Bengoa sindikatuetako ordezkariek lanorduen murriztea onartzeko eskatu zieten Eusko Jaurlaritzari eta Confesbask patronalari.

■ Trenak 9.400 milioi aurrezten dizkio EAERI

TRENBIDEAREN erabilpenari esker Araba, Gipuzkoa eta Bizkaiko gizarteak urtean 9.400 milioi pezeta baino gehiago aurrezten dituela ziurtatu du Renfek, Alemaniako Karlsruheheko Unibertsitateak eta Suitzako Infras AG aholkularitza enpresak egindako inkerketean oinarrituta.